

**TULAFONO TAU FAAOFI O LE FALETUPE
O ASIA MO ATINAE TETELE MA LE
FAAFAIGALUEGAINA O TUPE 2017**

SAMOA

Faamatalaga e Faamalamalama ai

1.0 Sini autu ma mafuaaga

- 1.1 Ua talosagaina e le Tulafono Tau Faaofi le faamamaluina aloaia o Mataupu o le Maliega i le Va o le Malo ma le Faletupe o Asia mo Atinae Tetele ma le Faafaigaluegaina o Tupe (Faletupe).
- 1.2 O Mataupu o le Maliega na faia i le va o le Faletupe ma atunuu uma ua avea ma sui (e aofia ai Samoa i le taimi lava e maea ai ona faatino lona avea ai ma sui). O Mataupu o le Maliega o lo o manaomia ai se pepa faaletulafono o le faamaoniga, taliaina po o le faamaoniga e faailoa ai le maliega a Samoa e noatia ai i Mataupu o le Maliega. O lenei tulaga, faatasi ai ma le maea ona totogiina e Samoa o le vaegatupe e totogi muamua faavaitaimi o le tupe Faavae e teufaafaigaluega, o le a maea ai le faagasologa o le avea ai o Samoa ma sui ma avanoa ai le Faletupe e faaauau ona faatupeina atinae i Samoa i se taimi vave e mafai ai.
- 1.3 O sini autu o le Tulafono Tau Faaofi o le faatagaina lea ona nono mai ma taulimaina tupe faamatu mai e le Faletupe. E le faatapulaaina lenei faiga i le na o le Malo - e mafai foi e le Faletupe ona faamatu atu nei tupe i isi tagata i totonu o Samoa (e ese ai na i lo le Malo) faataitaiga: o se faalapopotoga tumaoti po o se faalapopotoga. O le Faletupe i se isi itu, o se tuufaatasiga lea o le Faletupe o le Lalolagi ma le IFC, e ala i le ofoina atu o tupe i luga o tuutuuga tau atinae i le Malo ma le Vaega Tumaoti. Afai e tuuina atu e le Faletupe, tupe i le vaega

tumaoti, e i ai le aia tatau a le Malo e teena ai (faamaonia i luga o le tulaga e leai se tetee).

- 1.4 Ua aiaia foi i le Tulafono Tau Faaofi o tulaga aloaia, puipuigamalu ma tuusaunoaga tau lafoga ua tuuina atu i le Faletupe e tulaga tutusa ma le faiga o lo o faatino i isi faalapotopotoga faava o malo ua aloaia e Samoa. E amanaia e le Faletupe na o tulaga aloaia tau faagaoioiga ma puipuigamalu (ae lē faapei o tulaga aloaia tau le va o Malo ma puipuigamalu). O lona uiga, e faatoa faaogā e le Faletupe lona tulaga tau le tuusaunoaga o lafoga pe a oo ina faatino ana galuega tauave aloaia.

Fuaiupu:

- Fuaiupu 1:** - ua aiaia ai mo le igoa puupuu ma le amataga.
- Fuaiupu 2:** - ua aiaia ai mo fuaitau ma faamatalaga i totonu o le Tulafono Tau Faaofi.
- Fuaiupu 3:** - ua noatia ai le Malo.
- Fuaiupu 4:** - ua faataga ai le Malo e nonō po o le maua mai o tupe mai le Faletupe e avea ai ma sui o Samoa ina ia tusa ai ma se maliega. O le aofai o tupe e nonō mai e ao ona fuafuaina e le Minisita e fitoitonu ma tupe (Minisita) e ala i le iloiloaina o itu taua ua lisiina ma e ao ona totogiina atu i se faaputugatupe faapitoa ua atofaina ma faaalaina mo na o faamoemoega lava na nonō mai ai ia tupe.
- Fuaiupu 5:** - ua aiaia ai mo Mataupu e uiga i auala o le a faatino ai e le Malo ana noataga i lalo o maliega. Ua tuuina atu ai malosiaga i le Minisita po o se tagata ua faatagaina e ala i se faiga tusitusia e le Minisita (e avea ai ma sui o le Malo e tuuina atu ai faamalumaluga, pepa faamaonia e totogi ai aitalafu po o isi pepa faaletulafono e aloaia ai aiaiga ma tuutuuga o le maliega o faaunegatupe talafeagai. E tuusaunoa faamalumaluga, pepa faamaonia e totogi ai aitalafu po o isi lava pepa faaletulafono e tuuina atu i lalo o lenei Fuaiupu, mai

tiute o faailoga tusi po o lafoga. E tuusaunoa faaunegatupe e maua mai i lalo o le maliega mai so o se noataga tau lafoga.

Fuaiupu 6: - ua aiaia ai mo se avanoa o faiga e teuteuina ai se finauga pe afai e tulai mai so o se finauga i le va o le Faletupe ma le Malo i lalo o se maliega ua faaee atu e lenei Tulafono Tau Faaofi po o i lalo o so o se faamalumaluga, pepa faamaonia e tofogi ai aitalafu, po o pepa faaletulafono ua tuuina atu i lalo o so o se maliega o faaunegatupe.

Fuaiupu 7: - ua aiaia ai mo le tulaga o le faletupe ma lona agavaa faaletulafono e saunia ai konekarate, maua mai ma faatauina atu meatotino feaveai pe lei foi, ia faataunuu ma tali atu i taualumaga faaletulafono ma ia faia isi galuega e mafai ona talafeagai ai po o e aogā mo lona faamoemoe ma gaoioiga faatino.

Fuaiupu 8: - ua aiaia ai mo le faaaogāina o tulaga aloaia ma puipuigamalu ua faatagaina atu i faalapotopotoga faava o malo i lalo o le Tulafono o Tulaga Aloaia ma Puipuigamalu Tau le Va o Malo 1978, i le Faletupe.

Fuaiupu 9: - ua aiaia ai e faapea e tatau i le Faletupe ona maua avanoa i puipuigamalu mai so o se ituaiga faagasologa vagana ai i Mataupu ua taua; faataitaiga: e sueina ai tupe e ala i nogatupe po o isi auala, e faamaonia ai noataga ma isi.

Fuaiupu 10: - ua aiaia ai mo faamalumaluga o aseta ma faamaumauga o tausia a le Faletupe mai le sueina, mauaina mai, aveesea faamalosi, po o so o se isi lava ituaiga o faiga e faalavelaveina ai, po o le aveina po o le faalēaogāina e le Pulega po o se gaoioiga faaletulafono.

Fuaiupu 11: - ua aiaia ai mo tulaga aloaia mo fesootaiga ua faatagaina i le Faletupe ma ona sui auai.

Fuaiupu 12: - ua aiaia ai mo puipuigamalu ma tulaga aloaia ua faaavanoa atu i le Faletupe ma ona tagata faigaluega ma tagata ofisa a o galulue ai i galuega i totonu o Samoa, po o le uia o se faagasologa faaletulafono,

pueina faapagota po o le taofia o se tagata, susesueina o ato malaga a le tagata, ma isi.

Fuaiupu 13: - ua aiaia ai mo tulaga e aliae mai pe afai e tuusaunoa le Faletupe mai le totoigiina o lafoga ma tiute. Ua faapea foi ona faailoa mai ai le faamoemoe o Samoa ina ia tuusaunoa le aia tatau e totogi ai lafoga a tagatanuu Samoa po o tagata o le atunuu o faafaigaluegaina e le Faletupe - ma o sea tuusaunoaga e manaomia ina ia faamauina i le Pepa Faaletulafono o le Faamaoniga, taliaina po o le faamaoniga o Mataupu o le Maliega ma teuina i le Faletupe, talu ai e na o le pau lea o le avanoa mo se atunuu auai e faia ai lenei tuusaunoaga.

Fuaiupu 14: - ua aiaia ai mo nisi tuusaunoaga ua tuuina i le Faletupe mo faatauga po o auauanaga ua faia i le faatinoga o gaoioiga po o auauanaga aloaia a le Faletupe ua aiaia e le Faletupe i totonu o Samoa, i le faatinoga o ana galuega aloaia.

Fuaiupu 15: - ua tuuina atu ai i le Faletupe malosiaga e tuliloa saoloto ai gaoioiga aloaia uma i totonu o Samoa, e aunoa ma so o se isi tapulaa i le noatia ma fai fuafua i Mataupu o le Maliega.

Fuaiupu 16: - ua aiaia ai mo le pule faitalia a le Faletupe e tuusaunoa ai so o se tulaga aloaia, puipuigamalu ma tuusaunoaga ua faaee atu i ai i lalo o lenei Tulafono Tau Faaofi.

Fuaiupu 17: - ua tuuina atu ai le malosiaga i le O Le Ao o le Malo e faia ai tulafono faatonutonu mo faamoemoe o le Tulafono Tau Faaofi ma faamamaluina atoatoa ai le faafoega lelei o le Tulafono.

Faamatalaga 1:- ua aiaia ai mo Mataupu o le Maliega.

.....

(Hon SILI Epa Tuioti)

MINISITA O TUPE